

漢名臣傳

廿二下



內閣文庫		
三八函	二二〇五	漢書
一四架	一六〇冊	類

內閣文庫		
二九	二二	漢書

內閣文庫		
番號	漢	2305
冊數	160	(140)
函號	290	43



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



勅諭

命勳回匪善新勳旋卒於途

諭曰雲南提督李勳歷任提鎮宣力有年今

春因查辦緬匪一事調任滇省即親赴孟艮

等處督率追勦不辭勞瘁辦理頗合機宜朕

特念其年逾七旬降旨令回駐普洱茲據奏

片途病故殊深軫恤著加恩贈太子太保加

祭一壇應得卹典該部察例具奏尋

賜祭葬如例諭莊毅十一月
諭曰前因已故提督李勳辦事出力曾傳旨

漢名臣傳卷二十一

七

楊應琚詢其有無子嗣曾否出仕今據奏有
子李逢堯現年十四並未隨任著傳諭該督
俟其年至十八卽送部引見四十年逢堯赴
部引

見奉
旨交巡捕營以千總用

楊永斌列傳

楊永斌雲南昆明人由舉人於康熙四十五
年授廣西臨桂縣知縣丁憂服闋補直隸阜

平縣知縣六十年調大成縣六十一年因緝
犯不力革職雍正元年

詔復職七月遷涿州知州三年奉

旨楊永斌才守俱優著授貴州威寧府知府
六年遷貴東道七年擢湖南布政使九年四
月調廣東布政使七月以前威寧府任內隨
征米貼逆苗議敘軍功加一級十月疏言律
禁鐵器出洋近因廢鉄可鎔製兵械一体嚴
禁惟鉄鍋尙准洋船貨賣臣查出口船少者

漢名由傳 卷二十二
百連多者千連每連二十舫一經鎔鍊器械
無不可爲請照廢鉄禁

諭曰此奏甚是足見畱心地方庶務十年三
月署廣東巡撫五月疏言水師戰船全賴椗
纜維繫聞浙省每船設椗三門遇風浪三門
並拋船藉安穩又藤纜易脆裂不若棕之綿
固粵省外洋艚船拖風各船掙纜多不畫一
請增椗三門畫改棕纜又言粵東不乏可墾
之土而民間不勤稼穡致米穀昂貴臣仰体

皇上重農至意飭屬勸墾其高亢不宜禾植
者令樹藝豆麥山麓偏坡亦酌栽所宜木植
至惠潮兩府向多曠徒現招墾大官田荒地
免蹈法網所墾田成熟後歲可得官租千餘
石歸粵秀書院爲膏火均得

旨嘉允九年寔授十一年疏言粵東省城商
船雲集俱在南海縣屬之佛山鎮貿易距縣
治五十餘里鞭長莫及向設五斗口巡司一
員職微不足彈壓請改設同知其巡檢移駐

平洲堡巡緝

詔如所議行十二年五月疏言教官與諸生最切近平時不加誡勉徒以無優劣具結塞責遇生監有違犯經府州縣審出則補詳劣行巧爲掩飾請嗣後有似此者以溺職糾叅如三年內能使生監並無過犯或隨即據寔詳報准予題陞九月疏言臣遵旨勘明可墾地六千八百餘頃此外或山深箐密或失沙帶鹵体察民情不但俱費工本

兼恐磽地薄收糧賦無出臣思瘠田產穀雖少若多墾數十萬頃年豐可得數十萬石卽年歉亦必稍獲於民生寔有裨益宜多方勸導以盡地利查廣東通省惟新寧縣糧額內有斥鹵輕則畝征銀四釐六毫四絲米四合二勺六抄仰懇

聖恩凡承磽瘠之地概准以斥鹵輕則輸糧卽給照爲業十年起科混冒按律治罪庶沃壤不致冒承輕則而磽地亦知田糧易輸阡

陋自廣均下部議行乾隆元年六月疏言揀
選題補人員例限一月查取結不能于一月
內辦理或具題後補取印結送部又徒爲具
文請嗣後揀選陞^補人員卽於該管上司委
報冊內摘取政績考語入奏毋庸展轉取結
致逾定限至題報丁憂病故亦請以題咨開
缺之日起限一月揀選調補九月疏言
大清會典開載凡買田地房產例用布政使
契尾後改用契紙今契紙已革而契尾未復

臣思契尾係投契時官爲印給不同契紙另
需民間價買滋擾請仍舊例由布政使編發
各地方官粘民契後鈐印給發每歲奏銷時
將用過契尾數目申報藩司查考其稅銀如
有盈餘仍令儘收儘解庶民無觀望而官吏
侵收與奸民捏契之弊可杜部議如所請行
二年三月調湖北巡撫九月調江蘇巡撫三
年四月疏辦松江太倉所屬塘工五款一奉
賢南漕上海寶山四縣因築塘取土成渠兩

積既漫民田又易浸損塘根臣親勘形勢開
河一道南接華亭運石河北達寶山高橋卽
所以起土培築塘身並設木橋利濟一華亭
金山嘴地方逼臨洋面外有金勝三山聳峙
海中潮勢直射塘脚雖于內築排樁石垣不
足以資捍衛請從外廢塘缺口處增築石垣
南接舊塘爲重門保障一華亭縣外護工塘
內倪家路一帶形勢灣兜納潮受衝亦屬險
要舊塘宜加寬厚一寶山縣西浦現加築土

塘自姚家坎至城東一帶雖係險要然塘脚
日漸漲沙可保護無庸興築石垣坡惟楊家
嘴砲台處正當東北海洋潮勢衝險請將砲
台移築百丈內卽舊基改石塘三百丈一江
南沿海最險之工莫如寶山請建海神廟虔
祀恭請

皇上御製碑文匾額垂永久部議從之五月
諭曰楊永斌久膺外任聲名素優是以用爲
蘇州巡撫近聞伊年將七旬精力不逮難勝

繁劇之任著來京署禮部侍郎事務十月授
吏部右侍郎四年因病乞休

命以原品休致五年卒孫瑾官浙江按察使
梁詩正列傳子敦書附

梁詩正浙江錢塘人雍正八年一甲三名進
士授編修十年充山東鄉試正考官十二年
尚書房行走充

日講起居注官尋遷侍讀十三年六月遷侍
講學士十一月丁母憂乾隆元年

諡曰向來翰林丁憂者有在京修書之例梁

詩正著來京在南書房行走三年六月補侍
讀學士十月充順天武鄉試正考官十二月

遷內閣學士充
經筵講官四年正月遷刑部右侍郎五月調

戶部右侍郎五年閏六月詩正父文濂年七
十奏請二品封典

上允所請
御製詩賜之曰舊日文章彥熙朝鄉貳班重

邀花誥寵不異彩衣班堂有槐三木門如水
一灣更思躋壽世希瑞遍塵寰十一月轉左
侍郎六年三月充

皇清文穎館副總裁尋條奏變通二款一入
旂閒散人丁宜分置邊屯以資生業也查旂
人除各省駐防與近京五百里俱聽屯種餘
並隨旂

皇上至仁如天凡為旂人資生計者委曲備
至而旂人仍不免窮乏蓋生齒日繁若不使

自為養而常欲官養之勢有不能臣謂非屯
田不可今內地已無閒田

興盛二京膏腴未盡闢

世宗憲皇帝時欲令黑龍江寧古塔等處分
駐旂人耕種查辦已有成議未及舉行今不
早為之所雖現在尙可支持而數百年後旂
戶十倍於今以有數之錢糧贍無窮之生齒
使僅取給于額餉之內則兵弁之閔支不足
供間散之坐食欲增給于額餉之外則民賦

斷難稍加國用在所必需待養者眾固無餘財給之分戶日繁京師亦無餘地處之惟有酌派戶口散列邊屯使世享耕牧之利以時講武且可充寔駐防一綠旂增設兵丁宜量停募補以減冗額也查現在各省馬步兵餉較康熙年間漸增至五六百萬在各營鎮每處浮數千百名不覺其多在朝廷合計兵餉則冗額歲不下數十百萬各省錢糧大半畱充兵餉其不敷者隣省協撥

而解部之項日少向來各營多空糧自雍正元年徹底清查此弊盡除是近年兵額但依舊制亦比前有虛實之別况直省要害之地多滿洲駐防與各標營鎮協聲勢聯絡其增設兵額可以減汰者宜酌定數目遇開除空缺卽停止募補於將來營制漸有節省而現在兵丁寔無裁汰之苦奏入

上嘉納之十一月管理吏部右侍郎十年擢戶部尙書十二年充文獻通考總裁十三年

調兵部尙書十四年二月晉太子少師十一月兼刑部尙書十二月兼翰林院掌院學士命協辦大學士十五年正月遷吏部尙書教習庶吉士五月御史歐堪善疏劾詩正徇庇行私各款

諭曰歐堪善奏梁詩正一摺朕召軍機大臣吏部堂官掌院學士及該御史面加詢問高山係梁詩正房師至帶領引見吏部祇據投供人員依次擬缺大學士公傅恒因在軍

機處承旨知其現在直隸修城而該司以修城無案可稽部選自遵成例帶領引見單內夾片聲明則高山之引見道缺係該堂官公同辦理其不出于梁詩正一人瞻徇師生情分不待辯矣保舉金烈一事亦該堂官公同商辦其不由科道與例不符曾于摺內聲明梁詩正並將不合例之處先期商之傅恒及詢歐堪善以金烈有無實緣梁詩正形跡令其回奏據稱並無可指此二款雖有師生同

鄉之嫌初無暖昧徇私寔跡至姚範陳兆崙
列入京察一等則姚範人本平常不堪超擢
之選陳兆崙前次京察一等現係丁憂並不
在京供職此則梁詩正不無徇其翰林翰
班引見臨期越次更換每不過一二員或因
偶爾遭疾亦事之所有若如歐堪善摺內所
指已有五員此中不無高下其手著問明更
換情由是否出自梁詩正之意再行交部察
議梁詩正協辦閣務專領銓曹其供職內廷

不過筆墨之事初非格外加之寵任若謂其
招權納財植黨營私則是伊福薄不能承受
恩典矣且朕何如主而大臣能恣行其胸臆
乎至小小瞻徇情面則不獨梁詩正舉朝大
臣恐俱未能盡絕且如張廷玉掌院幾三十
年似此擡越引見之事不知凡幾何以並無
一人叅奏然卽有其事亦復何關政治在梁
詩正有此一二可議卽被叅奏得以知所儆
省未始非福歐堪善之言當以爲感而不當

海名目傳卷二十一
以為怨也時御史儲麟趾疏叅四川學政朱
荃匿喪

上以詢詩正詩正奏對未晰交部察議尋議
革職

命從寬畱任十二月

恩賞其子舉人敦書廕生分部學習十六年
廬

暉南巡詩正父年八十

特晉一品封典給假畱侍旬月十七年疏詩

終養

賜以詩曰遺榮空谷道未老暫抽簪甚悉忠
勤意寧知孝治心歡承備鐘鼎跡異樂泉林
翻祝歸朝晚卿家慶倍深二十二年

上南巡詩正迎
盜

命在籍食俸二十三年六月丁憂九月

特命署工部尙書二十四年正月調署兵部
尙書四月

命在紫禁城內騎馬八月充順天鄉試正考官二十五年七月教習庶吉士九月寔授兵部尙書協辦大學士兼翰林院掌院學士充經筵講官二十七年充順天鄉試正考官二十年六月

命爲東閣大學士兼管吏部尙書十月晉太子太傅詩正以次子敦書任貴州知府俸滿當來京引

見奏請爵部得

旨以戶部郎中用十一月詩正卒

諭曰大學士梁詩正老成端重奉職恪勤侍直內廷晉階翰林閣方資簡任遽聞溘逝深爲軫恤著皇五子前往奠醑並加贈太保入祀賢良祠賞給內庫銀一千兩治喪念伊子梁敦書尙未到京萬次乏人著派內務府司官一員前往經理喪事應得卹典該部察例具奏尋

賜祭葬如例謚文莊二十九年

諭曰原任大學士梁詩正靈樞歸里沿途文武官弁在二十里以內者著俱赴舟次治奠並遣人護送俾得穩抵故里以示優卹四十五年

上追念內廷詞臣資望最久者莫如詩正及故刑部尚書張照

御製懷舊詩列詩正於五詞臣首

詩曰未可甘盤倫祇宜顏般等信稱館閣材句每有清警踐更既已深遂亦絲綸領一夜

無病逝入閣寔未永持身恪且勤居家儉而

省內廷行最久交接一以屏不似張揮霍故率稱其冷翻以是嘉之吾豈蔽近倖詩正子

二長同書原任侍讀次即敦書由廕生分工部學習乾隆十六年遷奉天府治中奉

旨留部以員外郎用十七年補刑部員外郎二十年授貴州同仁府知府二十四年調遵

義二十八年俸滿

特命以戶部郎中用尋丁父憂服闋補戶部

郎中三十三年調吏部郎中三十四年授江蘇常州府知府三十五年遷湖南岳常澧道三十八年調駟鹽道四十一年九月遷福建按察使十一月調湖南四十三年調廣東四十四年擢湖北布政使四十六年奉旨來京另用四十七年二月授左副都御史五十年七月遷工部右侍郎八月署兵部右侍郎五十一年卒

張渠列傳

張渠直隸武強人由副貢任太常寺博士加捐郎中雍正五年補刑部郎中尋充大通橋監督七年發廣東以道府用八年四月上以渠兩任倉差声名俱好辦理亦屬諳練諭督撫酌量題補六月題補惠州府知府奉旨擢肇羅道十年遷按察使十二年三月疏言竊案宜分夥党多寡器械有無定罪請嗣後三人以下持械行竊雖不得財杖六十徒一年四人以上雖不得財亦無器械爲首者

徒一年爲從者杖一百得財爲首者發邊衛
充軍從者流三千里六人以上不論會否得
財首從徒三年賊重爲首者流三千里從者
減一等至十人以上不分首從俱發邊衛充
軍地方官疎防諱匿照強盜例處分疏入議
行四月遷布政使十三年正月調江蘇布政
使乾隆三年疏言江省營馬放青向無定所
多踐食田禾又壤濱江海處爲牧場與民爭
訟請令駐防六旗營汎視馬數定牧場禁民

佔墾如無曠土卽將營中公地州縣官墾改
設或值民間草地豁租立界如踐食田禾旂
兵鞭一百營兵杖四十過多者依毀伐稼穡
律治罪草伍追賠該管官失察者罰俸縱庇
者降革又奏請變通舊例二條一向例地丁
錢糧經徵州縣欠一分至四分者降職戴罪
徵收督催道府直隸知州欠五分以上降職
戴罪督催俱限內不完始議降調署任官初
叅三分以上經徵督催俱降一級調用二限

未完不及一分降一級畱任臣思正官僅止
虛降而署官之咎獨嚴勢必嚴行酷比請署
官處分與正官畫一庶免偏枯一向例戰船
小修勦限四月大修六月違限一月者承修
官降一級調用二月三月以上降二三級調
用五月以上革職督修官與督撫俱分別罰
俸降調至內河弁兵平時哨船與外海戰船
不同而修造違限一例處分輕重失宜請酌
定不及一月者免議兩月三月以上罰俸四

月以上降一級畱任五月以上降一級調用
督修以次遞減較別項工程處分已重比外
海戰船處分已減承辦之員不致櫟懼重罰
均下部議行尋擢湖南巡撫疏言乾州永綉
同知鳳凰營通判管轄紅苗遇逋犯懸賞購
捕養廉僅自給請每年各增銀二百兩以資
緝捕

詔如所請行四年二月調江蘇巡撫十一月
疏劾蘇州織造兼管澣墅閔海保貪婪枉縱

各款

命總督郝玉麟等會鞫得寔擬罪如律五年
四月疏言吳江縣盛澤鎮地界浙江商販雲
集易藏奸匪請將縣丞移駐以資彈壓部議
從之七月調湖北巡撫十一月卒

沈德潛列傳

沈德潛江南長洲人乾隆四年進士改庶吉
士七年授編修八年遷左中允累遷侍讀左
庶子侍講學士充

日講起居注官九年充湖北鄉試正考官遷
少詹十年晉詹事充武會試副考官十一年
三月授內閣學士八月請假歸葬得
旨不必開缺

御製詩賜之曰我受德潛德淳風挹古初從
來稱晚達差未負耽書方藉通元筆胡懸孟
韋車其如感風木暫許返林闔南國欣歸陸
東門漫擬疏江鄉春意嬾能不憶金除
命給德潛三代封典十月

漢名目傳卷二十二
諭曰朕向畱心詩賦不過幾餘遣興偶命屬
和其中才學充裕如沈德潛等間或一加超
擢而躁進之徒競思進獻若借此可爲梯雲
之捷徑不知沈德潛優陞閣學朕原因其爲
人誠寡謹厚且憐其晚遇是以稠疊加恩以
勵老成積學之士初不因進詩優擢雕章琢
句專事浮華此風一熾必有藉手捉刀希圖
僥倖者傳諭知之十二年四月
命在尚書房行走六月假滿赴職

賜詩曰朋友重唯語況在君臣間我命德潛
來豈宜遽引年隴岡表阡罷白駒來賁然卽
此至性脍令我愈以憐畫錦非所誇孝烏或
致焉席前陳民瘼不負予諮延兒輩粗知書
善爲道孔顏尋擢禮部侍郎十三年充會試
副考官尋
諭曰沈德潛年力就衰著以原銜食俸在尚
書房行走十四年
詔原品休致

漢名臣傳卷二十二
賜人獲官帛

命有所著作許寄京呈覽尋進所著歸愚集

上南巡

諭在籍食俸

賜詩曰水碧山明吳下春三年契濶喜相親

玉皇案吏今詞客天子門生更故人別後詩

裁經細檢當前民瘼聽頻陳老來底越精神

健劫外胎禽雪裏筠是冬以祝

皇太后六旬萬壽詣京十七年正月回籍十

月進所撰西湖志纂二十二年

上南巡加禮部尚書銜疊前韻

賜詩曰前席何曾隔六春三千里不間疎親

星垣帝友豈無友吳下詩人尙有人各度癘

情期達隱平量句義欲肱陳步趨望九雖稱

健靈壽聽教手握筠二十六年詣京祝

皇太后七旬萬壽

上命集在朝諸王文武及致仕大臣年七十

以上者爲九老凡三班並繪圖德潛列致仕

漢名臣傳卷二十二

吳

漢名目傳卷二十一
九老之首時德潛進所撰選刻

國朝詩別裁集請

御製序文

上以德潛選次未當

命儒臣重爲精校去雷

賜之序曰沈德潛選國朝人詩而求序以光其集德潛老矣且以詩文受特達之知所請宜無不允因進其書而粗觀之列前茅者則錢謙益諸人也不求朕序朕可以不問既求

朕序則千秋之公論繫焉是不可以不辨夫居本朝而妄思前明者亂民也有國法存焉至身爲明朝達官而甘心復事本朝者雖一時權宜草昧締構所不廢要知其人則非人類也其詩自在聽之可也選以冠本朝諸人則不可在德潛則尤不可且詩者何忠孝而已耳離忠孝而言詩吾不知其爲詩也謙益諸人爲忠乎爲孝乎德潛宜深知此義今之所選非其宿昔言詩之道也豈其老而耄荒

漢名目傳卷二十一
子又不克家門下士依草附木者流無達大
義具巨眼人捉刀所為德潛不及細檢乎此
書出則德潛一生讀書之名壞朕方為德潛
惜之何能阿所好而為之序又錢名世者
皇考所謂名教罪人是更不宜入選而慎郡
王則朕之叔父也雖諸王自奏及朝廷章疏
署名此乃國家典制然平時朕尚不忍名之
德潛本朝臣子豈宜直書其名至于世次前
後倒置者益不可枚舉因命內廷翰林為之

精校去留俾重錄版以行於世所以栽培成
就德潛也所以終從德潛之請而為之序也
十月

諭曰今年恭逢

聖母皇太后七旬大慶在籍諸臣來京叩祝
具見悃忱獻歲之初朕恭奉

安輿時巡南服諸臣甫及旋里復當出境迎
銜僕七道途於林下高年諸多未便可諭諸
臣今冬曾經赴闕者明春無庸赴省候接在

漢名目傳 卷二十一
兩浙者不必至江南在江南者不必至東省

如沈德潛即于蘇州錢陳羣即于嘉興餘均
視此為例副朕体恤至意二十七年

駕過常州德潛偕錢陳羣來
賜詩曰去歲入都祝

慈壽皤然九老領林泉清詞還擅香山會歲
幸便教故里旋更止遠迎塵跋涉所期重晤

得流連論文兼及蒼生隱虛席誰嘗宣室
三十年

上南巡晉階太子太傅

賜其孫維熙為舉人

賜詩曰吳中今古老人科比似徵明定若何
書畫雖輸詩勝彼功名已過壽如他遊山有

興仍清健處世無爭祇善和明說九旬有三
歲那更年格尚嫌多三十二年

賜人復三十三年亦如之三十四年八月
諭兩江總督高晉浙江巡撫永德前經降旨

將錢謙益之初學集嚴行查禁嗣據奏到陸

續名臣傳卷二十一
續收繳銷燬因思沈德潛錢陳羣二人平素
工于聲韻其收藏各家詩集必多在錢陳羣
于錢謙益詩文似非其性之所近且久直內
廷尙屬經事諒不至以應禁之書轉視爲可
貴若沈德潛向會以錢謙益詩選列國朝詩
別裁集首經朕于序文內申明大義令其刪
去但既謬加獎許必于其詩多所珍惜或其
門弟子狃于錮習向欲奉爲辦香矣以沈德
潛齒宿德尊謂可隱爲此護愆惡存畱亦未

可定果尔豈沈德潛不知恩重不復望朕爲
之慶百歲也沈德潛錢陳羣自退居林下以
來朕恩禮優著所以体恤而矜全之者無所
不至伊二人寧不感戴殊榮勉思仰副若其
家尙有錢謙益初學有學等集未經呈繳者
卽速遵旨繳出與二人毫無干碍斷不必慮
及前次收藏之非妄生疑畏豈朕成全兩人
至此而委曲令其繳出轉從而加之罪責乎
高晉永德將此旨密諭沈德潛錢陳羣知之

九月德潛病卒高晉覆奏德潛家並無未繳錢謙益詩文集

諭曰沈德潛積學工詩者儒晚遇受朕特達之知嗣以年高引退特許歸里俾得頤養天和爲東南縉紳領袖前者屢次南巡見其精神強健疊沛恩施年來復時予存問方冀壽躋百齡益承優眷今聞溘逝深爲軫惜如恩贈太子太師入祀賢良祠又

御製詩曰平生德弗愧潛修晚遇原承恩顯

稠壽縱未能臻百歲詩當不朽照千秋飾終宣命加優典論定應知有獨畱吳下別來剛四載悵然因以憶從頭

賜祭墓如例諡文愨四十二年江南東台縣已故舉人徐述夔著一柱樓集詩詞悖逆經縣民首告集內載德潛爲述夔作傳下大學士九卿議請追奪德潛階銜祠諡仆其墓碑諭曰沈德潛所作傳內稱其一柱樓編年詩已付梓並云品行文章皆可法是沈德潛於

漢名臣傳卷五十二
徐述夔悖逆不法詩句皆曾閱看並不切齒
痛恨轉爲之記述流傳尙得謂有人心者乎
沈德潛自中式進士及選入翰林時朕因其
平日學問尙好格外施恩又念其畱心詩學
且憐其晚成是以不數年間擢爲卿貳又令
在尙書房行走而伊自服官以來不過旅進
旅退毫無建白並未爲國絲毫出力眾所共
知及乞休後給尙書銜晉贈太子太傅並予
在籍食俸恩施至爲優渥沈德潛理宜飭躬

安分謹慎自持乃竟敢視悖逆爲泛常爲之
揄揚頌美寔屬昧良負恩且伊爲徐述夔作
傳自係貪圖潤筆爲囊橐計其卑污無恥尤
爲玷辱搢紳使其身尙在雖不至與徐述夔
同科亦當重治其罪今伊業已身故不加深
究然竟置而不論俾其身後仍得享受恩榮
則凡在籍朝紳又將何所警惕乎著照所請
行以昭炯戒四十四年

御製懷舊詩列德潛五詞臣末

詩曰東南初二老曰錢沈則繼並以受恩眷
佳話藝林志而寔有優劣沈躋錢為粹錢已
見前詠茲特言沈率其選國朝詩說項乖大
義製序正厥失然亦無訶勵仍子飾終恩原
無責備意昨秋徐案發潛乃為傳記念國庇
逆臣其罪寔不細用是追前恩削奪從公議
彼豈魏徵比仆碑復何日蓋因毫而荒未免
圖小利設曰有心為吾知其未必其子非已
出統袴甘賤棄孫至十四人而皆無書味天

獨有明報地下應深媿可惜徒工詩行闕信
何濟

譚行義列傳

譚行義四川三壘人康熙五十八年由武舉
授陝西西寧衛千總雍正二年隨大軍平青
海四年遷河南城守營守備五月遷叅將七
年河東總督田文鏡劾行義養解陝營馬疲
瘦得

旨革職來京引見旋

賜

上諭一部及貂皮香珠復職八年遷廣東惠州副將十一年擢高雷廉總兵

賞戴花翎尋丁母憂

命在任守制十三年總督鄂彌達檄行義統兵五千協勦貴州逆苗六月抵古州分遣策應清江入塞堵禦黎平兩路進勦滾縱高表等寨經畧張廣泗又調赴援上江搗烏婁擺吊等險巢會搜牛皮大箐惡寨冷

乾隆元年調福建漳州總兵三年五月調湖南鎮守總兵十二月署廣西提督四年十一月寔授十二月議敘協勦逆苗功加銜一等五年閏六月統兵會勦楚粵逆苗八月與總督馬爾泰署巡撫安圖會奏宜山縣土蠻恃險劫掠派遊擊楊剛勦破白土邱索二村拏斬首惡及餘賊匿密崗中分路勦捕梟示撫其脅從

上嘉其成功迅速六年正月行義奏慶遠府

屬忻城土縣之外八堡地方積賊藍明星等恃險焚劫會商督臣礮副將畢映往捕又撥標營兵四百扼要堵禦有莫明權等投首願縛賊贖罪明星聞風遁入山箐旋督兵搜獲並於斬要犯多人四月奏漢奸黃順等潛入楚粵毗連之懷集惑眾謀逆勾黔省黎阿蘭等散賣族印約時起事臣與督臣調兵攻克賊巢於賊首及黨七十餘名尚有十四名未獲嚴催訪拿均

報聞又疏言柳州府城內兵多民少俱住草房易遭火患雍正十一年知府袁承幼捐銀四百兩給被火兵民借建瓦房但所捐過少今查兵丁草房尚有千五百楹或附倉庫藥局或連壇廟衙署仍屬堪虞請將承幼所捐交文員專管借給被火居民再借

恩賞息銀四千兩交中軍叅將會同馬平縣經管借給失火兵丁有先願改建者一体借給每楹九兩分三年繳還從之七年正月奸

漢名目傳卷二十二
匪李彩於遷江縣屬石版村樹旂聚眾謀攻
城行義矜之並奏遷江縣遼濶無塘汎匪犯
得潛藏請于城北北四地方設汎撥賓州營
把總一兵五十城西平陽墟增巡檢一弓兵
二十四駐防巡查七月奏言臣閱邸抄見兵
部議侍郎舒赫德條奏內城九門外城七門
揀設銅鐵礮各十位九年演放一次奉
旨欽准在案臣思九年爲日太久應照入旗
例三年演放一次每次每演四位九年三次

不致銹蝕礮手新舊二十二人均不敷用每
礮加二名學習演放俾器不虛設人收寔用
疏入均

報聞八年因擅借給兵丁倉穀部議降一級
調用十二月授登州鎮總兵十一年擢江南
提督十四年調浙江提督十六年調福建陸
路提督十八年八月以病解任九月卒
賜祭葬如例諡恭愨

鄒一桂列傳

漢名臣傳卷二十一
鄒一桂江南無錫人雍正五年進士改庶吉
士散館授編修十九年充廣西鄉試副考官
尋授雲南道監察御史十二年疏言民間嫁
娶及契買奴婢不用官媒惟戶婚詞訟或入
官發賣之人始用之然亦止令書名畫押近
不法之徒私養婦女覓主局姦吞騙無所不
爲請

勅步軍統領順天府五城各衙門訪拿嚴禁
並定地方官失察處分下部議行十三年提

督貴州學政乾隆三年奉

旨畱任四年疏言黔省漢苗錯處雍正三年
前學臣王奕仁奏准歲科兩考於定額外加
進苗童一名卷面填寫新童字樣查歸化已
經百年之苗俗尙文風與漢無二請准入漢
童內應試其歸化未久者照例歸入新童六
年疏言歲科考一二等生員例得幫增補廩
黔省歲案幫補以行文科考日爲止與各省
同科案幫補則於鄉試前科冊解部日卽停

是歲案得缺倍多科案得缺至少請改於下
屆行文歲考日停止以昭平允部議均從之
七年疏言刑部向例秋審結案者歸北監現
審未給者羈南所司獄禁卒例不更換益以
結案之犯

恩旨於每月初二十六兩日許家屬入視家
人在監者每日准出入買辦而未結之犯案
情未定概不許人出入以杜傳信串供今臣
查視南所北監已未結雜收不無滋弊請

勅部分禁於收禁時立檔開明已結未結人
犯字樣庶易稽查得

旨照所請行是年遷禮科給事中八年七月
疏言近見奉

旨發議之事科道於部議未上之先攙越瀆
陳徒滋繁擾應請申飭

諭曰科道職司言路凡有見聞自應陳奏但
如鄒一桂所奏攙越瀆陳則大不可嗣後遇
有交部議事件如科道不待部覆參差具奏

海名月傳卷二十二
者該部於議覆本內將伊等意見參差之處
聲明請旨九月疏言樂舞生向來多弊是以
定例令州縣官會同教官選補文章取隣族
結冊送學政查核現經禮部覆准河南學政
林枝春條奏改由學臣錄取此法一行恐不
肖學臣藉以網利請照舊例補送下部議行
九年與給事中陳大珍先後疏劾革職巡撫
許容不宜仍署湖北巡撫
上嘉納之詳許容傳十年四月遷太常寺少

鄉九月疏言監獄重犯雖防範不得不嚴然
律載獄具全圖鉄索鈕鏡俱有定式獄官果
遵式慎選禁卒不時查點安有越獄之虞從
前禁卒人等因需索故以防範為辭或用梃
床以束其身鉄簫以直其項觀音圈以攣其
手足種種非刑經部議嚴禁載入則例乃日
久另創新制囚徒無分多寡概令排頭仰臥
於脚鐐手靠之中橫穿長木鎖遍兩端壓其
手足不能屈伸轉側搔仰痛癢寔與梃床無

漢名曰... 卷二十一
異獄囚多緣斃命該管上司以脫監處分最
嚴並不嚴禁以穿木束因爲通例直省類然
晉豫尤甚請

勅督撫臬司諸臣嚴禁部議從之十一年遷
大理寺少卿十二年授僉都御史十三年遷
大理寺卿一桂工繪事所進圖畫多邀
御題十五年遷內閣學士十七年八月充會
試副考官十二月擢禮部右侍郎十八年轉
左十九年同部侍郎張泰開保舉一桂子志

伊爲國子監學政

詔下部議泰開以瞻徇革職一桂降三級留
任二十年以瞻徇尙書王安國左都御史楊
錫綏准其父入祀鄉賢祠降二級畱任二十
一年

上以一桂年老不勝侍郎之任調補內閣學
士二十三年十二月疏請致仕
允之

陞辭

漢名曰

卷二十一

奇

漢名目傳卷二十一
御製詩二章賜之其一曰懷鄉念切老年索
弗許翻嫌不情一胸陞辭雙淚下原猶戀
闕可憐生其二曰簪纓歸里榮依舊花鳥怡
情樂正賒吳下詩人應好在白頭相聚話烟
霞時沈德潛致仕家居
上憶及之故云二十六年来京恭祝
皇太后萬壽蒙
恩預九老會
賜遊香山二十七年三十年

上南巡一桂雨迎

駕

賜畫神頤壽額三十六年復來祝

萬壽預會

賜遊如前

命加禮部侍郎銜在籍食俸三十七年歸里

道卒

諭曰禮部侍郎銜鄒一桂供職有年人亦醇

謹前以老告休昨冬來京見其精神尙能如

卷二十一


舊特... 准其在籍食俸俾首... 查令於春

和... 水程南歸頃聞行至山東汶上縣地方

患病... 逾殊為可憫著加賞尚書銜仍著該

部照尚書應得卹典察例具奏尋

賜祭葬如例



保三

漢名臣傳卷二十二終

